



partii naleraq

Apriliip 1-at 2019

UPA2019/imm. 220

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Angajoqqaat atugarisaannik ilisimasaqarfimmik qitiusumik katersuiffeqalernissaanik pilersitsisoqarnissaanik apeqquteqaat aallaavigalugu oqallisissiatut siunnersuut. Oqallisissiatut siunnersuutip siunertarissavaa angajoqqaat atugarisaanik ilisimasanik katersuiveqalernerup kingunerisaanik Angajoqqaat illersuisuanik pilersitsinissamut tunngavissaqalernissaq.

(Inatsisartunut ilaasortaq Jens NapâtôK', Partii Naleraq)

Partii Naleqqamiit politikikkut anguniakkatsinni soqutigisarilluinnarparput sulissutigerusullugulu ilaqutariit peqqissut atugarissaartullu. Tassungalu ilanngullugit angajoqqaat peqqissut atugarissaartullu.

Angajoqqaat ullaakkut iteraangamik isumagisartik pingaarnerpaaq isumagilersarpaat. Tassalu meeqqap isumaginissaa. Meeqqap iterluarnissaa, nerisinnissaa, asattornissaa, atisalernissaa, meeraaqqerivimmi aamma meeqqerivimmi paaqqinnittarfimmiittarpat, atuarfimmiittarpat, ilinniarnertuunngorniaappat aamma inuussutissarsiorluni ilinniartuuppat, kiisalu suliffeqalersimalluni ineqatigineqaruni. Ataatsimut oqaatigalugu asanninnermik, isumassuinnermik aamma inuiaqatigiinni inooqataanissaanik aqutissiuussineq.

Angajoqqaap meeqqaminik isumaginninnermi saniatigut namminerisaminik inuttut asattuulluni inooqataanissani pingaartitaraa. Suliffeqarunilu suliffimminik piffissamillu nakkutiginninneq, ineqarunillu akiligassanik nakkutiginninneq inillu aserfallatsaalinnissaa torersarlugulu, ila angajoqqaat nakkutigisassarpassuarnik akisussaaffimmillu imaannaangitsumik ullormiit ullormut angajoqqaatut inuuneq atortarpaat.

Angajoqqaalli tamarmik atugarissaartuunngillat. Anaanat kisimiittut taamatullu ataatat aamma kisimiittut inuiaqatigiit akornanni inooqataapput, angajoqqaatullu taakku aamma akisussaaffeqarlutillu pisussaaffeqartut. Angajoqqaatulli allatut akisussaaffimminnik pisussaaffimminillu pingaartitsisuupput meeqqaminnillu nakkutiginnilluartuullutik.

Taamaattoq angajoqqaat aappariit atugaanniit atugarissaannginnerusutut inissisimasarlutik. Illuinnaasiortumik perorsaantertik pissutigalugu, naak tamatigut meeraq anaanaqarlunilu ataataqartaraluartoq taamaattoq atugaat imaannaaneq ajorput.

Naak asanninneq, isumassuineq aamma inuiaqatigiinni inooqataanissaannik peqataatitsigaluarlutik angajoqqaatut periarfissaat killeqarnerusaqaat. Taamaattumillu ilaatigut ikorfartorneqarnissaminnik pisariaqartitsisarlutik.

Angajoqqaat ulluinnarni inuunerannik oqilisaassinissamik siunertaqarluta arlaatigut iliuuseqassagutta suut angajoqqaat atugaasigut iluarsisariaqartut qanorlu angajoqqaat ikorfartorniartugit iliuusissamik pilersitsisinnaavugut?

Angajoqqaat illersuisuannik pilersitsisoqarnissaa siunertaralugu angajoqqaat atugaannik ilisimasamik qitiusumik katersuiffimmik peqarnissaq Partiimmita allat qanoq isumaqarfigaat?

Taamatut apeqquteqaat aallaavigalugu Partii Naleqqamiit oqalliseqatiginissarsi qilanaaralugu saqqummiussaqaarpunga.

Qujanaq